



Maria Thewissen - Venzin

1918 - 2011

Scriver in necrolog ei descriver la veta vargada d'ina persuna, in seregurdar dad ella e schar reviver ella. Igl ei era in engraziament per quei ch' ella ha fatg per las familias pli parentadas ed era per il beinstar dalla cuminonza.

Cura ch'ils zenns da bara han tuccau igl em-prem di d'october a Rueras e Sedrun ed udend tgi che seigi miert ein segir biars sedumandai tgi ei quei: Maria Thewissen . Buca da sesmar-vegiliar! Nossa onda Maria ha bandunau siu da casa da Rueras fetg baul. Igl em-prem attestat da lavur ei dataus digl onn 1935 si da Luzern.

Naschida ei l'onda Maria il meins da matg 1918, igl onn dalla grippa. Consequenza dalla grippa ei stada ch' ils geniturs Vigeli Venzin e Barla Venzin – Giger han piars duas poppas, ina dad in onn e l'autra da treis onns el medem onn. In onn suenter ei igl aug Testa naschius e duas jamnas suenter sia naschientscha ei la mumma Barla morta. Il tat ei restaus anavos cun otg affons. Tgei tragedia, tgei anguoschas e tgei forza e curascha quei ha custau da continuar per bab e per ils affons, vegnin nus buca a saver cumprender. L'onda Maria sco igl aug Testa ein mai seregurdai da lur mumma.

Persuenter seigi ella stada la puppa dil bab, «ina puppa da zucher» sco londa Zia scheva magari. Ed ina zaclina che prendevi si mintga malsogna. «Gie, schi dat in suffel sianta nossa Maira segir el» era il commentari dalla onda Zia. Il tat Vigeli ei staus pli che mo bab per ses affons ed en discuors cun els han ins adina sentiu tgei carezia e stema el ha gudiu dad els.

L'onda Maria ei serendida cun 20 onns en claustra a Baldegg. Muort malsogna ha ella bandunau quella, stuiu prender cumiau da quella carriera e serender el spital. Serevgnida da sia malsogna eis ella segidada cun familias basignusas. Sur Brugger da Rueras che ha giu fatg persenn da siu bien maun dad ira entuorn cun affons ha animau ella da far la scola da tgirunza d'affons a Seltisberg sper Basel. Da siu examen e diplom ha ella savens raquintau. Sch'ei fussi iu per la scola vessi ella mai dumignau, denton hagien ei serrau giu omisdus egls e manegiau

che la luvrar quenti dapli e luvrar sappi ella, e dau il diplom igl onn 1944. Sco tgirunza ha ella luvrav empau dapertut. A Turitg, era en Surselva e 1949 tier ina famiglia Beaufort dalla Belgia ad Ascona. 1950 serenda ella cun quella famiglia en Belgia. Igl ei stau ina famiglia pli nobla che ha surdau ad ella buca mo la tgira, era l'educaziun da lur affons. Prest 30 onns viva ella en Belgia. Ella ha fatg carriera, sco nies tat Vigeli menziunescha, en ina brev dil settember 1950: Ussa sche Ti sas perfin ira cun velo vegnas schon da viagiar empau. Mo hagies quittau de buca far mal cun quei sport. – Il tetel da campiunessa ha ella buca conquistau dad ira cun velo. Denton ha ella tgirau e tratg si affons da pliras famiglias. Quei ha dau contacts che han teniu tochen oz. Cheu en Belgia ha ella era fatg enconuschiantscha cun siu um igl Johann Thewissen. 1966 han els mari-dau, 1971 ei igl aug Gion dalla Belgia sco nus numnavan el, gia morts. – L'onda retuorna 1978 en Svizra, gl'emprem en la bassa el cantun Sutsilvania e 1981 a Mustér. Pervia dall'asma che turmentava ella ha ella buca saviu prender dimora en Tujetsch. A Mustér en la casa Muntatsch ha ella dau albier da vacanzas a biars enconuschents ch'ella haveva dalla Belgia. E vegnend pli veglia e las forzas tunschevan buca pli, ei quei iu fetg vess da dar si tut quei. Ils contacts cun sia Belgia ein era sesminui cun quella caschun.

1994, suenter la mort dalla sora Constanzia 1993 e dalla sora Zia 1994, eis ella sezza sedecidida da prender dimora en casa sogn Gions a Mustér. Il pass ei buca staus levs ed igl emprem temps ei staus grevs per ella. Pér cura ch'ella ha giu sia cumpignia, viu e saviu guder il comfort d'in hotel nua che tut vegn fatg e tut ei pinau per ins, eis ei iu meglier. Ella ei secumadada, ha priu lev, ha gudiu e bien e savens ha ella detg: «Ju a bien ad ju stun ugen».

Dapi igl uost ein las forzas idas da rudien a piarder. Ella seigi schon morta scheva ella, ei seigi mo la bucca che mondi aunc.

Ed il davos temps ha ella plirau dil mal, dil staunchel, dil buca puder pli. «Mumma gida mé» clamava ella savens, la mumma ch'ella ha strusch viu. Il venderdis notg ei sia veta sestezza sco ina candela senza tschera, il flad vegnius pli e pli levs, e sco davos ha ella serrau ferm sia bucca, sco per dir: «so ussa va ju paterlau avunda» ed ella ei spartida.

Cara onda Maria, igl ei stau bi da saver gidar Vus ed accumpignar Vus tochen alla mort. Engraziel per tut quei che Vus haveis fatg per nossas famiglias e sin in bien seveser.